

## Sabotajeak Bizkaian eta Gipuzkoan

## Urtuellako PSE-EEren egoitza kiskalita geratu da atzoko erasoaren ondorioz

Erasoa gaitzesteko ezohiko osoko bilkura egingo du Udalak gaur eguerdian

Agentziak / Bilbo

Urtuellako PSE-EEko Herriko Etxeari eraso zioten atzo goizeko hamarretatik eta erdiak aldera. Bost kaputxadunek egoitzaren tabernan erregaia bota ostean, sua eman zioten, eta haren ondorioz guztiz kiskalita gelditu zen.

URTUELLAKO PSE-EEko Herriko Etxeari eraso zioten atzo 10:30ak aldera bost kaputxadunek, Ertzaintzak jakinarazi zuenez. PSE-EEko egoitzaren taberna zabaldu eta minutu batzuk geroxeago, erasotzaileak kristalak apurtu eta tabernaren barruan sartu ziren. Behin barruan, erregaiz beterik zeramatzen bidoiak bertan hustu eta sua piztu zuten. Erasoren ondorioz, taberna zeharo kiskalita geratu zen, eta suteak sortutako keak egoitzaren beste instalazioetan ere kalteak eragin zituen.

PSE-EEk zabalduzako informazioaren arabera, une hartan egoitzaren barruan zeuden lau pertsonak itzali zuten sortutako sutea tabernan zeuzkaten suitzailuek.

Atzoko erasoak agintari sozialisten berehalako gaitzespena eragin zuen. Nicolas Redondo Terreros PSEko idazkari nagusiak EAJri exijitu zion kale borrokaren erasoak pairatzen dituzten ordezkariei sozialistek benetako



XOUSE SIMAL

Urtuellako sozialisten egoitzako taberna eraso gertatu ondoren.

elkartasuna adieraz diezaien, «urte askotan EAJk herrialde honetako demokrateri eman diena bezalakoa». Atzo Durangon egin zituen Redondok adierazpen horiek, Gladis Garciari, Bizkaiko udalerri horretako sozialisten bozeramaileari, elkartasuna adieraztera joan zenean.

Redondok, halaber, gizar-tean zatitze prozesua gertatzen ari dela esan zuen, eta, beraz, kale indarkeriaren aurrean lasaitasuna eskatu zuen; izan ere, haren ustez, «ekintza bortitz hauek desagertu egingo dira udal hau-

teskundeak hurbiltzen doazen heinean».

Erasoa dela-eta, ezohiko udalbatza egingo du gaur eguerdian Urtuellako Udalak. Ostean ekintza politikoa egingo du PSE-EEk. Ekitaldian parte hartuko dute Redondo Terreros, Patxi Lopez Bizkaiko PSEko arduradunak eta Urtuellako alkate Jose Antonio Pastorrek.

Erasoren berri izan ostean horri buruzko iritzia eman zuen Pastorrek. «Haserre eta suminduta sentitzen naiz», esan zuen. Urtuellako alkateak EAeko erakundeak kriti-

katu zituen, ez dituztelako erasoak gaitzetsi. Horretaz gain, Lopezek dei egin zion herritarrei indarkeria horren aurrean ETaren aurka erakutsitako gizabidezko kuraiari eusteko.

«Lotsagarria da eraso basati hauen aurrean erakundeek hartzen duten jarrera, beste alde batera begiratzen dute, eta ez dute ezer egiten. Bada garaia behingoz denok gure erantzukizuna hartzeko eta erasotzaileei deitzeko merezi duten bezala, faxista hutsak besterik ez dira eta», gaineratu zuen.

## Tolosako eta Eibarko epaitegiei eraso diete hainbat ezezagunek

Efe / Donostia

EIBAR eta Tolosako epaitegiei su eman zieten hainbat ezezagunek atzo goizaldean. Eibarren molotov koktel bat jaurtiz eta Tolosan likido su-eragile baten bidez eraso zieten bi epaitegiei, eta Herrizaingo Sailak azaldu duenez, altzarietan eragin dituzte kalterik handienak.

Lehen eraso goizaldeko 00:15etan gertatu zen, Tolosan. Informazio agentziek zabaldu dutenez, hainbat ezezagunek Tolosako Epaitegiko leihoa hautsi zuten, barrena likido su-eragilez betetako bi txanbil jaurtiz. Horren ondoren su eman zioten zuzi batekin. Suak mediku forentsearen bulego zaharrenean eragin zituen kalte larriak, Herrizaingo Sailaren arabera. Tolosako Epaitegiaren kontra hainbat sabotaje egin dituzte dagoeneko. Azken eraso urtarrilaren lean gertatu zen.

Eibarko Victor Sarasqueta kalean dagoen epaitegiari, berriz, goizaldeko 1:50 inguruan egin zioten eraso. Horretan ere erasotzaileek kristala hautsi zuten, baina molotov koktel batek eragin zuen ondoren piztu zen sutea. Suteak zaindariaren gelako altzariak eta epaitegiko korridorea kaltetu zituen batez ere, baina han zeuden dokumentu eta papekek ez zuten kalterik jasan.

## Durangoko PSEko hautetsi bati etxean egin lehergailu bat ipini diote auto azpian

Agentziak / Bilbo

DURANGOKO Udaleko Gladis Garcia zinegotzi sozialistaren auto azpian jarritako lehergailu txiki bat indargabetu zuen atzo goizaldean Ertzaintzak. Sozialisten udal taldeko bozeramailearen autoaren aurka egiten den bigarren eraso da, iragan otsailaren 25ean molotov koktel bat jaurti baitzioten, nahiz eta ez zuen kalte handiegirik egin.

Gauerdia baino beranduxeago aurkitu zuten lehergailua kotxearen azpialdean,

eta Ertzaintzak handik gutxira indargabetu zuen. Herrizaingo Sailak azaldu duenez, etxean egindako lehergailua zen, eta gasolinazko txanbil batek eta petardo batek osatzen zuten.

Horren berri jakin ondoren, Nicolas Redondo Terreros PSE-EEko idazkari nagusia Durangora joan zen Gladis Garciari bere elkartasuna adieraztera. Eguerdi aldera iritsi zen Durangora. Honela hitz egin zuen Redondo Terreros gertatutakoari buruz: «Tamalez,

gure askatasuna murrizten saiatzen ari dira, baina ez dute lortuko». «Egunero-egunero ikusten ditugu indarkeria ekintzak, eta batez ere astebukaeretan. Hiltzeari utzi diote, baina oraindik ez dira adierazpen askatasuna bezalako eskubideak errespetatzen», gaineratu zuen.

Garciak, bestalde, ez diola bere lana egiteari utziko adierazi zuen. «Borrokan jarraitzeko eta nire ideiak defenditzen jarraitzeko gogoz sentitzen naiz oraindik», baieztatu zuen.



TXEMA FERNANDEZ / EFE

Gladis Garcia eta Nicolas Redondo Terreros atzo.